



Seeimâ kulen kávnoo ráávhu

Oulu pispetáálu šiljoost lii juovlâseimâ. Ton lappâd ij pyevti väzzid ooroosthännáá, ko tot tuodâi rávkká huámmášume. Advent ääigi pargosajan puádidijnân mun lijkkuustâlâm jyehi peeivi tuom muorâst rahtum seimâhuksiittâs, mast ulmuuh já elleeh láá masa siämmáá stuárráh ko luándust. Mun lam huámmášâm, ete ton paaldân orosteh maangah kááđu alne jotteeh. Motomin peivikiäju párnááh puátih tárguttássáin ihástállâđ seimâhuksiittâs.

Taan čoovčâ almostittum uddâ epivirgálâš Uddâ testament jurgâlus UT2020 kiávttá seeimâst teermâ "ellei syeinih". Uddâ testament kreikakielâlii algáteevstâst fatnē (φάτις) puáhtá merhâšid ellei piemmâmkääri tâi vijdâsubbooht rakânâs, tile tâi saje, kost piemmih elleid tâi kuus čuákkejeh taid suáján. Tast peerusthännáá, ete jurgâluvvoov-uv sääni termáin seimâ tâi ellei syeinih, te juovlâevangeliumist merhâšume lii liijká čielgâs. Koččamuš lii saajeest, kuus Jeesus, maailm Pestee pieijui tállân šoddâm maŋa.

Ovdláhháá tai juovlâi mun keejâm Pispetáálu šiljoost orroo seimâhuksiittâs tuoivâlij čolmijguin, kuittâg šuáhkádmáin. Jispa puáttee ihe ličij pyreeb. Jispa mij pastaččijm estid korona levânem já pesâččijm oppeet čarviistid ustev kiedâ. Mij aibâšep nuuvt čuuvvij nubijdân ohtâvuodâ, kieresvuodâ já kuoskâtem. Muu vááimun pajaan advent rukkoos: Hoosianna! Oi išseed, kááijud!

Kiäččup siälun čolmijguin ton seeimân, kuus Jeesus, maailm Pestee šoodâi. Ij-uv lah imâšlâš, ete Immeel Kandâ algâttij elimis taan maailmist eidu siämmáánáál ko tun teikâ mun; uccen, piättáá, äpitemmin. Immeel šoodâi olmožin tuárispel pááikán. Sun lâi aabâs iärásij viäštust, nuuvtko puoh umogááh láá talle ko šaddeh.

Ko Jeesus šoodâi taan maailmân, te Immeel poodij konkreetlávtt mii alda já juovij ulmuu uási já tile. Olmožin šoddâm Immeel Kaandân maailm já ton ulmui kierdâmâšah iä tai-uv juovlâi lah vieres. Sun tobdá mii eellim já uási. Seeimâ piällást mii-uv kočoh jorgettid mii aldaulmui piälán. Seeimâ piällást lekkâseh vijdâsub uáinuh nubijdân olán, addâgâs addelmân já soovâtmân.

Pyeri ustev, mun ruokâsmitâm tuu tai juovlâi josijduđ seeimâ piälán já uuccâđ tobbeen ráávhu, maid taat liävuttes maailm ij paste adelid. Seeimân šoddâm Jeesus lopedij rávisolmožin šodâdijn suu čuávvoid tánávt: "Jieččân ráávhu mun adelâm tijjân, jiem taggaar, maid maailm addel. Orrood ruokkâdin, elled vuáju epituáivun." (Joh.14:27)

Sivnedum juovlah Tunjin já tuu aldaulmuid!

Oulust ovdláhháá advent 2020

Jukka Keskitalo
Oulu pispekode pispes